


錢錄

漢書門類	二六六〇	函架冊	八九四
------	------	-----	-----



漢書類	二六六〇	函架冊	三九四
-----	------	-----	-----

內閣文庫	
番號	漢 2660
冊數	8(5)
函號	295 70

十一



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak











欽定錢錄卷十

右宋太祖宋元通寶錢宋史食貨志太祖初鑄錢又曰宋通元寶今按唐鑄開元錢舊唐書言歐陽詢制詩曰開元流俗讀為開通元寶然則此錢亦當自上及下讀之而史緣淳化以下諸錢多右旋讀故併此稱為宋通元寶也







金鑑卷一  
右太宗太平通寶錢按食貨志太宗改元太平興國史鑄  
太平通寶錢





右太宗淳化元寶錢三體書按端拱二年改元淳化及鑄  
錢文太宗親書淳化元寶作真行草三體又律歷志淳化  
二年詔定秤法以御書三體淳化錢校實二銖四釵爲一  
錢者二千四百得十有五斤爲一秤之則又按真書元字  
亦左挑如開元錢












右太宗至道元寶錢亦三體書按淳化六年改元至道










右真宗錢咸平元寶有大錢一種祥符有通寶元寶二種  
景德文曰元寶天禧曰通寶凡六枚按真宗朝凡五改元  
皆著於錢文至天禧六年改元乾興未開鑄










右仁宗錢三品凡六枚篆書真書二體文俱為元寶按仁宗即位之次年改元天聖十年改元明道三年改景祐









右仁宗皇宋通寶錢亦二體書其真書者又一種差小按景祐五年改元寶元食貨志謂改元更鑄皆曰元寶而冠以年號至是改元寶元文當曰寶元元寶仁宗特命以皇宋通寶為文





右仁宗慶曆大錢二種文俱曰重寶而讀各不同按史慶曆末葉清臣為三司使與學士張方平等上陝西錢議曰關中用大錢本以縣官取利太多致姦人盜鑄其用日輕請以江南儀商等州大銅錢一當小錢三云云蓋其時大錢皆當十當五工費輕而民間邀利者多毀小錢私鑄故清臣等言之







右仁宗皇祐元寶錢按慶歷九年改元皇祐




和 右仁宗至和元寶錢篆書真書二體按皇祐九年改元至和




右至和通寶錢真書









右仁宗嘉祐通寶錢篆書真書一體按至和二年改元嘉祐








右嘉祐元寶錢真書



右英宗治平元寶錢篆書真書一體按嘉祐八年英宗即位次年改元治平食貨志治平中饒池江建韶儀六州鑄錢百七十萬緡




右治平通寶錢亦二體書特大小有間





右神宗篆書熙寧元寶錢前一種稍大後二種篆法各不同並錄之按治平三年神宗即位次年改元熙寧






右真書熙寧元寶錢




右熙寧重寶大錢亦二體書按通考神宗熙寧四年陝西轉運使皮公弼言頃歲西邊用兵始鑄當十錢後兵罷多盜鑄者乃以當二又減作當二行之至今銅費相當盜鑄衰息請以舊銅鉛盡鑄當二錢從之折二錢遂行天下云云則此大錢前為當十後減作當二者也餘品悉謂之小平錢矣







右神宗元豐通寶大錢較熙寧大錢畧相等按熙寧十一年改元元豐食貨志言元豐以後西師大舉邊用匱缺徐州置寶豐下監歲鑄折二錢二十萬緡





右元豐通寶錢篆書行書二體按神宗朝鼓鑄最繁食貨志言諸路大率務於增額而通考載諸路鑄錢總二十六監每年鑄銅鐵錢五百四十九萬九千二百三十四貫






右哲宗元祐通寶錢二體書按元豐八年哲宗即位罷舊所增置鑄錢監凡十四次年改元元祐至元祐八年八月庚午乃詔陝西復鑄小銅錢




右元祐通寶大錢蓋折二錢也亦二體書按食貨志元祐八年令折二銅錢許行於陝西及河東京西諸路仍限二年毋更用尋以人言折二錢不通行非便乃聽行使如舊







右哲宗紹聖元寶錢亦二體書按元祐九年改元紹聖又  
 考哲宗本紀紹聖元年正月辛丑罷河東大銅錢三年十  
 二月癸酉置施州鑄錢廣積監



右紹聖通寶錢行書




右紹聖元寶大錢折二也亦篆書行書二體


錢錄卷下

三









右哲宗元符通寶錢亦二體書食貨志元符二年下陝西諸路博究利害於是詔陝西悉禁銅錢在民間者盡送官而官銅悉取就京西置監



右行書元符通寶大錢亦折二也







右徽宗聖宋元寶大錢篆書行書二體按徽宗本紀崇寧元年十二月庚申鑄當五錢又食貨志崇寧二年五月令陝西及江池饒建諸州以每歲所鑄小平錢增料改鑄當五大銅錢以聖宋通寶為文今所錄二種皆文曰元寶意當時原有通寶元寶兩品耶




右聖宋元寶錢亦二體書篆書者後一種更輕小皆小平錢也按此錢與前折五錢皆一時所鑄食貨志稱三年遂罷鑄小平錢及折五錢置監於京城所復徐州寶豐衛州黎陽監並改鑄折二錢為折十蓋此錢與折五錢鑄於崇寧三年以前及蔡京秉國銳意欲興當十錢遂未久與舊折二錢咸罷廢不行也








右徽宗崇寧大錢隸書真書二體文曰重寶曰通寶而讀各不同按本紀崇寧三年正月戊子鑄當十大錢又食貨志崇寧四年立錢綱驗樣法崇寧監以所鑄御書當十錢來上緡用銅九斤七兩有奇鉛半之錫居三之一詔頒其式於諸路令赤仄烏背書畫分明又通考尚書省言崇寧監鑄御書當十錢每貫重一十四斤七兩用銅九斤七兩二錢鉛四斤一十二兩六錢錫一斤九兩二錢去火耗一斤五兩每錢重三錢





右徽宗大觀通寶大錢真書按崇寧六年改元大觀先是崇寧所鑄當十錢不便於民而私鑄日衆重罰不能止右僕射趙挺之御史沈疇屢以為言遂減作當五或當三繼復罷鑄至是蔡京復相再主用折十錢食貨志稱大觀元年二月首鑄御書當十錢以京畿錢監所得私錢改鑄尋與復京畿兩監以轉運使宋喬年領之喬年鑄烏背漉銅錢來工詔以漉銅錢頒行諸路








右大觀通寶錢亦真書按本紀大觀四年正月癸卯罷改鑄當十錢二月庚辰罷京西錢監食貨志稱蔡京復罷政矣詔止鑄舊額小平錢是也








右徽宗政和通寶錢篆書分楷二體按大觀五年改元政和食貨志稱政和元年詔往歲圖利之臣鼓鑄當十錢苟濟目前不究悠久公私為害行之幾十年其法日弊見在當十錢可並作當三而張商英請收當十錢母更用俟錢入官擇其惡者鑄小平錢從之此錢是也










右政和通寶大錢亦二體書按食貨志初蔡京主行夾錫錢詔轉運副使許天啟推行其法以來錫錢一折銅錢二會京罷政遂不行至政和二年京復相奏昨鑄夾錫錢精善請復鑄如故遂以政和錢頒為式此錢是也







右徽宗宣和通寶錢四種前一種篆書後三種以次遞小俱作分楷按政和七年改元重和次年改宣和食貨志稱東南錢額不敷宣和以後尤甚乃令饒贛錢監鑄小平錢



右宣和通寶大錢三種前二種篆書分楷二體後一種亦分楷而細緣稍大於前按食貨志鑄小平錢後文令江池饒錢監盡以小平錢改鑄當二錢以紓用度此錢即當三也








右欽宗靖康元寶大錢與宣和當二錢規制相等按宣和七年徽宗內禪次年改元靖康


欽定錢錄卷十

欽定錢錄卷十一

右南宋高宗建炎通寶錢靖康二年康王卽位於南京改元建炎按食貨志建炎經兵鼓鑄皆廢然考本紀建炎元年九月壬辰鑄建炎通寶錢則此錢是也









右建炎通寶大錢篆書真書二體此錢蓋與前品同鑄本紀建炎元年九月庚戌始通當三大錢於淮浙荆湖諸路按高宗朝只當二及小平錢二種不聞別鑄此大錢意即當二本紀蓋指先朝大觀等舊錢後改爲當三者非新鑄也




右高宗紹興元寶錢按建炎五年改元紹興本紀紹興元年八月壬午鑄紹興錢









右紹興大錢二體書一曰元寶一曰通寶讀各不同按食貨志以李植提點鑄錢公事植言今泉司小平錢一萬八千緡折二錢六萬六千緡云云則前品蓋小平錢而此大錢則折二與建炎二種同也



右紹興元寶大錢與前通寶一種同皆折二也背有星月文如開元製









右孝宗淳熙元寶大錢按乾道十二年改元淳熙本紀淳熙元年十二月丙辰罷鐵錢改鑄銅錢食貨志孝宗隆興元年詔鑄當二小平錢如紹興初注謂乾道淳熙迄於嘉泰開禧皆如之則此錢實與紹興折二同其背文八字十字十一字十二字十四字十六字則紀是年所鑄蓋淳熙十六年之次年即改元紹熙也至本紀又載六年十月庚子四川行當二錢意是別鑄或舊錢只行於蜀耳



右孝宗紹熙元寶錢小平錢也







右紹熙元寶大錢折二錢也




右寧宗慶元通寶錢背文穿上增漢字蓋即據地如漢陽監是也食貨志稱併富民監於漢陽監可據






右慶元通寶大錢按此錢大於前折二諸品考食貨志慶元三年復神泉監以所括銅器鑄當三大錢則此錢是也




右寧宗嘉泰通寶大錢按慶元七年改元嘉泰此錢蓋當三與慶元當三錢同



右理宗嘉定通寶大錢較前品稍大按開禧四年改元嘉定本紀嘉定元年十二月庚午四川初行當五大錢食貨志嘉定元年卽利州鑄當五大錢是錢蓋當五也




右嘉定通寶大錢折二錢也






右理宗大宋元寶錢按嘉定十八年理宗即位改元寶慶本紀寶慶元年秋七月乙酉詔行大宋元寶錢食貨志寶慶元年新錢以大宋元寶為文




右理宗紹定通寶大錢按寶慶四年改元紹定此亦折二錢也




右理宗端平通寶大錢按紹定七年改元端平此錢與嘉泰當三錢同應是當三錢也理宗朝專措置楮幣而銅冶大衰考本紀端平元年六月癸巳禁毀銅錢







右理宗嘉熙大錢二種曰通寶曰重寶按端平四年改元嘉熙食貨志嘉熙元年新錢當二并小平錢並以嘉熙通寶為文當三錢以嘉熙重寶為文今前一種蓋當二後一種則當三也




右理宗淳祐元寶大錢按嘉熙五年改元淳祐淳祐二年三月詔在外諸軍請給楮幣權以十八界三分增給又三年命淮東西總所餉軍券錢並給楮四分則當時用楮仍與錢並行特楮賤不得以錢權之故分配支給食貨志謂之品搭是也






右淳祐通寶大錢背文有當百字錢質厚重過於諸大錢數倍而史無明文按本紀淳祐九年三月乙酉以程元鳳為江淮等路都大提點坑冶鑄錢公事蓋是時所鑄又按淳祐十二年從監察御史劉元龍言遂令純用楮及至公私交弊明年仍用錢會中半則前此所云三分增給與給楮四分者又非定額矣賈似道當國主用會子亦曰交子後又變而為關子其意在於廢錢用楮故元龍純用楮之議顯為迎合然勢雖久行卒不能盡廢園法也




右理宗皇宋元寶錢按淳祐十三年改元寶祐食貨志寶祐元年新錢以皇宋元寶為文






右皇宋元寶大錢二種微有小大



右理宗開慶通寶錢按寶祐七年改元開慶本紀開慶元年五月乙丑行開慶通寶錢



右理宗景定元寶錢按開慶二年改元景定王圻續通考景定元年九月詔鑄新錢以景定元寶為文





右景定元寶大錢三種



右度宗咸淳元寶大錢二種按景定六年度宗即位改元咸淳此錢背文三字七字考咸淳七年元建國號越三年少帝顯德祐元年又一年景炎一年祥興而宋皆無復置監開鑄之事矣

臨安府行用

準叁伯文省



右錢牌一面曰臨安府行用一面曰準三百文省考元人  
孔行素至正雜記言南宋有錢牌長三寸有奇闊二寸令  
此尺度雖不同然爲錢牌無疑曰省者建炎三年四月正  
官名合中書省門下省尙書省爲一謂之知三省此蓋三  
省所鑄也南宋自建都杭州升爲府終南宋一百五十餘  
年皆稱臨安府此錢不審爲何時造據此則南宋當二當  
三當五當百諸大錢而外又有準三百文之錢牌而志傳  
俱未之錄想未久卽罷廢不行耳今附入于南宋諸品之  
末可以補舊史之所未備

欽定錢錄卷十一

